



# EDICT DV ROY,

*Pour l'establissement d'un Hospital general dans  
chasque Ville & gros bourgs du Royaume.*



OVIS PAR LA GRACE DE DIEU

Roy de France & de Navarre, à tous presens & à ve-  
nir salut; Entre les soins que nous prenons pour la con-  
duite de l'Estat que Dieu nous a confié, & qu'il a sou-  
mis a nostre autorité celuy des pauvres nous a esté en  
particuliere recomandation, & le grand desir que nous  
avons tousiours eü de pourvoir aux necessités des man-  
dians comme les plus abandonnés, de procurer leur sa-  
lut par les instructions chrestiennes, & d'abolir la mendicité & loysiveté en esle-  
vant leurs enfans aux mestiers dont ils seront capables: Nous auroit fait esta-  
blir l'Hospital general en nostre bonne Ville de Paris, par nos lettres de decla-  
ration du mois d'Avril mil six cens cinquante six, cét establissement ayant eü  
l'effect que nous nous en estions promis, le public a eü la satisfaction de voir  
nostre-dite Ville soulagée de l'importunité des mendians, & leurs enfans nour-  
ris à la pieté Chrestienne, & instruits aux mestiers & ouvrages qu'ils peuvent ap-  
prendre, jusques à ce qu'il y ayt des lieux & des ouriers dans les maisons du-  
dit Hospital pour des plus grandes manufactures, nos sujets ont veu de si grands  
succes pour la gloire de Dieu, & le salut des pauvres que plusieurs emeus de  
charité, & du desir de voir affermir la continuation de tant de bonnes œuvres y  
ont fait des aumones considerables. Nous l'avons aussi appuyé de nostre pro-  
tection, & favorisé de nos graces & liberalités; Mais quelque menage & éco-  
nomie que les directeurs d'iceluy y ayent peu apporter, quelque soin qu'ils y  
ayent pris pour chercher des moyens pour les faire subsister, tant par les advis  
qu'ils nous ont presentés que par les exhortations qu'ils ont procuré estre faites  
par les cures, & predicateurs, par les memoires qu'ils ont fait imprimer plu-  
sieurs fois de l'Estat & des besoins dudit Hospital; & par les questes faites en  
nostre Cour & suite, & dans les maisons de Paris par les Dames les plus qua-  
lifiées: Neantmoins la surcharge des mendians arrivés de diverses Provinces de  
nostre Royaume, est venue jusques à tel point que quoy que lesdits directeurs

Es.

A

n'ayent pas la moitié du revenu qui est nécessaire pour la subsistance ordinaire de quatre à cinq mille pauvres qu'ils ont nourris aux années precedentes, ils logent pourtant & nourrissent dans les cinq maisons dudit Hospital plus de six mille pauvres, ils donnent de plus la nourriture en six endroits de la Ville à trois mille autres pauvres mariez, outre lesquels on voit encore un tres-grand nombre de mendians dans lesdites Villes qui ne peuvent estre logez par faute de bastimens n'y nourris, parce que les revenus dudit Hospital ne montent pas à la moitié de la depense qui se fait par chascun an dans iceluy. C'est pourquoy considerant que quand les bastimens & revenus seroient augmentés, il seroit impossible sans ruiner cet Hospital de loger n'y nourrir tous les mendians qui abordent de tous les endroits en nostredite bonne Ville, les uns par la faineantise, les autres par faute d'ouvrage, & la pluspart par la plus grande necessité qui est à la campagne & à cause de cette occasion s'accoustument, & leurs enfans à cette malheureuse faineantise qui cause tous les desordres & la corruption, pourquoy les biens de la campagne sont en partie delaissez n'y ayant pas assez des personnes pour y faire le travail nécessaire, outre qu'il n'est pas juste que nostre bonne Ville de Paris fournisse seule la nourriture, que les autres Villes de nostre Royaume donnent chascune à leurs pauvres selon l'équité naturelle, & conformement aux Ordonnances des Roys nos predecesseurs. Sçavoir; Faisons qu'après avoir fait voir a nostre Conseil les Ordonnances des Roys nos predecesseurs, & notamment celles des Roys Charles neufvième, données a Moulins en 1566. & de Henry troisième, données a Fontaineblau au mois de May 1586. Registrées en nos cours de Parlemens, de l'advis de nostredit Conseil de nostre certaine science, plaine puissance & autorité Royale, & confirmant les anciennes Ordonnances, & y adjoustant les choses que l'experience nous a fait connoistre estre necessaires. Ordonnons : Voulons, & nous plaist qu'en toutes les Villes & gros bourgs de nostre Royaume, ou il n'y à point encore d'Hospital general estably, il soit incessamment procedé à l'establissement d'un Hospital & aux reglemens d'iceluy pour y loger enfermer & nourrir les pauvres mendians jnvailides natifs des lieux ou qui y auront demeuré pendant un an, comme aussi les enfans orphelins ou nés des parens mendians, tous lesquels pauvres y seront instruits à la pieté & religion chrestienne, & aux mestiers dont ils pourront se rendre capables sans qu'il leur soit permis de vaguer n'y sous quelque pretexte que ce soit d'aller de ville en ville n'y de venir en nostre bonne ville de Paris, & que les habitans des villes & gros bourgs y soient contraints par toutes voyes deuës & raisonnables, & afin que nostre volonté puisse estre promptement executée. Mandons à nos Amés & Feaux les gens tenans nos Cours de Parlement, Bailifs, Seneschaux, Prevots, leurs lieutenans, & à tous autres nos Justiciers & Officiers qu'il appartiendra, qu'ils fassent lire & enregistrer ces presentes pour estre executées selon leur forme & teneur, & aux Maires, & Eschevins, Capitouls, & Consuls des Villes, qu'au plustot ils ayent à comettre & deputer quelques uns d'entre eux pour s'assembler, afin d'aviser aux

moyens les plus propres & convenables à chascun lieu pour l'establissement desdits Hospitaux, & que les reglemens qui seront faits soient envoyés incontinent aux Greffes de nostredite Cour de Parlement selon leur ressort, pour connoistre de quel zele affection & diligence ils auront vaqué à ce que dessus, & estre lesdits reglemens registrés en nostredite Cour; Voulons & ordonnons que ce qui sera fait & advisé pour ce regard soit exécuté nonobstant oppositions ou appellations quelconque, & sans prejudice d'iceluy, & nonobstant aussi tous Edits, Ordonnances, usages, reglemens, mandemens, desdenses, & lettres à ce contraires ausquelles, & aux derogatoires des derogatoires y contenuës; Nous avons par ces presentes signées de nostre main derogé & derogeons car tel est nostre plaisir, & afin que ce soit chose ferme & stable à tousiours: Nous avons fait mettre nostre seël a cefdites presentes, sauf en autres choses nostre droit & l'autrui en toutes. Donnée Saint Germain en laye au mois de Juin, l'an de grace mil six cens soixante deux, & de nostre regne le vingtiesme; L O V I S: Signé le Roy P H E L I P E A U X.

L O V I S par la grace de Dieu Roy de France & de Navarre. A nos amés & feaux Conseillers les gens tenant nostre Cour de Parlement en Tolosé, Baillifs, Seneschaux, Prevots, leurs lieutenans, & a tous autres nos Justiciers & Officiers qu'il appartiendra. Salut, par nos lettres en forme d'Edict du mois de Juin mil six cens soixante six cy attachées sous nostre contreseël, & pour les considerations y contenuës; Nous avons ordonné l'establissement d'un Hospital general dans chascune des Villes & gros bourgs de nostre Royaume, ou il n'y en a point détable pour y loger enfermer & nourrir les pauvres mendians, lesquelles lettres estant à present surannées, vous pourriés faire difficulté de proceder à l'entherinement d'icelles sans nos lettres de surannation nécessaires. A ces causes considerant combien ledit establissement est avantageux, tant pour le bien de nos sujets soulagement des pauvres mendians que pour la gloire de Dieu; Nous vous mandons & enjoignons par ces presentes signées de nostre main, que nos dites lettres en forme d'Edict du mois de Juin mil six cens soixante deux, vous ayés à les enregistrer & le contenu en icelles, faire garder observer & executer de point en point selon leur forme & teneur par tous ceux & ainsi qu'il appartiendra nonobstant la surannation d'icelles, Edicts, Ordonnances, & reglemens à ce contraires. car tel est nostre plaisir: Donnée au camp prez Ninove, le douzième jour de Juin l'an de grace mil six cens soixante-seize, & de nostre regne le 34. L O V I S,

PAR LE ROY.

P H E L I P E A U X.

## EXTRAIT DES REGISTRES de Parlement.

**V**EV les lettres patentes du Roy signé louys, & sur le reply par le Roy Phelipeaux, sceillées du grand sceau de Cire verte à lacz de soye verte & rouge, par lesquelles sa Majesté en augmentant aux Ordonnances Royaux. Ordonne veut & luy plaist qu'en toutes les Villes & gros bourgs de son Royaume où il n'y à pas encore d'Hospital general estably, il soit incessamment procedé à l'establissement d'un Hospital, & aux establissemens d'iceluy pour y loger enfermer & nourrir les pauvres mendiants Invalides, natifs des lieux ou qui y auront demeuré pendant un an, Comme aussi les enfans orphelins ou naiz des parens mendiants, tous lesquels parens pauvres y seront instruits à la pieté & religion Chrestienne, & aux mestiers dont ils pourront se rendre capables, sans qu'ils leur soit permis de vaguer, n'y sous pretexte que ce soit d'aller de ville en ville, n'y d'aller en la ville de Paris, & que les habitans desdites villes & gros bourgs y soyent contraints par toutes voyes deües & raisonnables, & comme plus au long est contenu esdites lettres patentes. ET VEV le dite & conclusions du Procureur general du Roy, la Cour a ordonné & ordonne que lesdites lettres patentes du Roy seront registrées en ses registres pour le contenu en icelles estre gardé & observé suivant la forme & teneur, & qu'elles seront registrées & publiées dans toutes les seneschaussées du ressort de la Cour. Prononcé à Toulouze en Parlement le septiesme septembre 1676.

*Monsieur OLIVIER, Rapporteur.*

Collationné LOUGLA, signé de MALENFANT.

*Collationné par nous Conseiller du Roy & Secretaire  
en la Cour de Parlement de Toulouze.*

